

capai tan'a'a mataa takukua

tinimana cu kara kasu umoni tan'a'a mataa takukua? sua tan'a'a ia makasi, “'ak! 'ak! 'ak!”. sua tatutua ia makasi, “ku~ ku~ ku~” misee. 'una cau makasi, tumatimana tan'a'a umoni, makai kani mapinipini! makai 'una nimaroka nonoman 'esi tikirimi. sua takukua tamna riang ia, miarara kani. makai nipamuci 'esi pai'e'i! makananu kusai cupungu musu? cinimura cu kara kasu tan'a'a mataa takukua, 'esi arakukunu na kakangca mingane? cinimura cu kara kasu 'esi arakukunu nguani sumasima'u? koo pa ku cinimura. 'una kari makasi, tan'a'a mataa takukua ia, pakacangini kani. 'apaco'e maraa tatia sua takukua, nakai ma'icupu na tan'a'a, ka'anu aracapici 'inia. neni kusai vanai? tavaru'u kara kasu?

miana, cani pininga kani tan'a'a mataa takukua. mesua matua nguani tamna capai, paira maracocua aracakanu. noo 'unain niaracakanua ia, kungangaan nguani, pakar'u arakukunu. 'una kani ucani rovana, kana'amisan mesua, makungu taniara. mara nguani maringuna karu na tarako vatu matu'apuru micicu. paru'una cu tassa, makasi tan'a'a, tantanau isi, miseni maningcau cucumeni tapinange, manung timanun nguani tamna

riang. ka'anu manung capai mita, aka riang mita? marivari takukua, 'una ku kangvang makasia cupungu, cucuru parapusu 'ikua! nakai tia pakunnanu ia? makasia kucu! aritapasu mita. makasi sua tan'a'a, maritapasu nanu? kesoni sua takukua. aapungu mita misee sua tan'a'a.

mata'uru tan'a'a maritapasu na takukua tamna aapungu. mara tan'a'a karananana tapasu, matimanungu maritapasu 'inia. makai cu masini cu'ura mita capai takukua. pumanungu takukua musu'uvu na tan'a'a. tia cu mairi takukua maritapasu na tan'a'a. vurungana cu mesua, masarunpu cu tassa. sumipukuru vo'in sua tan'a'a, mupupangu cu takukua mara 'amuru maritapasu na tan'a'a tamna tina'an. makasua si'icupu cu.

akini taniara. mata'uru takukua aramia'u. cu'urun kee tan'a'a ta'urum kavangvang tina'an, cucuru aka capai. tavaru'u nguain tia arakuracu sua tan'a'a. koo pa maritaru tan'a'a aramia'u, makacang mingane manguru. aranai mesua, koo cu nguani arakukunu, pakacangini matarava masini.

烏鴉和老鷹的長相

傳說烏鴉和老鷹原本是一家人，當時牠們的長相一樣，經常一起狩獵，彼此友愛的相處。有一個夜晚牠們在石洞裡生火取暖，烏鴉說，為什麼別的鳥類都很漂亮，而我們的長相不美麗，老鷹說，這樣吧！我們用畫的，就畫我們的羽毛！烏鴉先畫老鷹的羽毛，畫上現在我們所看到老鷹的樣貌。換老鷹畫烏鴉時已是深夜，老鷹隨手拿了木炭隨意的塗鴉就睡覺了。老鷹醒來，看到烏鴉全身是黑色的，知道烏鴉會生氣，當即逃走，從那時開始彼此仇視到現在。